

Beer Ludivic, Surrein/Sedrun



Il Vic Beer, sco el vegneva numnaus da tuts vischins ei naschius ils 23 d'uost digl onn 1911 ella biala ucliva da Foppas vi Surrein. Ses geniturs ein stai Vigeli Beer e Cristgina, naschida Hendry. Ensemen cun ses fargliuns, sis buobs ed ina buoba ha el passentau ina ventireivla affonza emplenida da laver e legria. Neu da Surrein ha el frequentau a Sedrun las usitadas scolas da vischnaunca. Da lezs onns ha ei dau nuot auter da silsuenter serender egl jester e fadigar il paun da mintgadi. El ei segidaus cun la famiglia cun esser fumegl tier purs ad Ursera ed a Cazis.

L'encarschadetgna ed il ligiom cul tratsch dalla patria ha laschau returnar il Vic anavos e supreender il puresser dil bab a Surrein ensemen cun ses fargliuns. Els, ils Beers, ein stai purs en uorden, cun detgs nuegls e bials animals, purs incarnai. Ina greva operaziun d'in calun ha fatg fin cun la laver dil pur. Aschia eis el cun ses fargliuns serendius a Sedrun e secasaus leu per passentar communablamein la sera dalla veta.

Per il cuminesser eis il Vic buca staus lischents. El ha mess a disposiziun sias forzas e habilitads ed ei staus denter auter era quater onns gerau da vischnaunca. Il Vic fuva in cantadur da vaglia, in bassist per propri. Aschia ha il Chor baselgia apprezziau in tal cantadur ed el ei staus engrazievels cun esser 27 onns commember da quel e daventar commember d'honur.

Ussa ella biala vegliadetgna dad 80 onns ha il Segner clamau il Vic tier el. El ei morts ils 29 d'avrel 1992. El rauassi ella beada pasch.